

# Oz è il Di internaziunal da la meteorologia

La meteorologia ha da far cun l'aura.  
Damai pudess ins era dir a quel di  
il Di internaziunal da l'aura.



Uffiz federal da cultura UFC

Schweizerische Eidgenossenschaft  
Confédération suisse  
Confederazione Svizzera  
Confederaziun svizra



text: Charitina Josty, illustraziun: Yvonne Giemel,  
grafic: Theres Jörgler, fotografia: Jörgler-Staubs  
zambregid ha: Freya Tschuor  
© Lia Rumantscha

KIDSFITSCHE  
Lia Rumantscha


# Il Di internaziunal da la meteorologia

Pertge èsi impurtant da savair co che l'aura è il proxim di?

Ils purs per exempel ston adina savair tge che l'aura fa. Sch'i dat ina notg fraida la primavaira, ston els proteger lur plantas. Per far fain èsi meglier, sch'igl è sitg e bel. Ed era per tai èsi flot da savair tge che l'aura fa damaun – sch'i plova pos ti trair en ils stivals da gumma e sch'i fa chaud las sandalas.

Co vegnan fatgas las previsiuns da l'aura?

Dapertut sin il mund – era sin navs ed en aviuns – hai apparats che mesiran la temperatura, la plievgia e quant sulegl ch'i dat. Questas infurmaziuns vegnan tuttas ramassadas sin in computer. Il computer fa lura blers quints cumplitgads per far la previsiun. Sche quai vul dir naiv, plievgia u sulegl ans san dir las meteorologas ed ils meteorologs.



Bun di, ti char sulegl,  
levà es ti oz bain marvegl,  
scleras ussa fin e chaud,  
da tuts survegns in grond, bel laud.

Cotschen da la damaun  
fa puz e paltaun,  
cotschen da la saira  
fa bella tschera.

Pertge datti in Di internaziunal da la meteorologia?

L'aura n'enconuscha nagins cunfins dals pajais. Perquai èsi impurtant che meteorologas e meteorologs da tut il mund lavurian ensemen. Per exempel pervi dals huricans: quests stemprads èn privlus e sche las meteorologas ed ils meteorologs dad in pajais san ch'i dat in hurican, pon els avertir

lur collegas en ils auters pajais. Per ch'els possian lavurar bain ensemen e barattar infurmaziuns, è vegnida fundada ils 23 da mars 1950 l'organisaziun «World Meteorological Organization», l'organisaziun mundiala da la meteorologia. Ils 23 da mars è l'anniversari da questa organisaziun.



I plov' e dat sulegl,  
las chauras fan cussegl,  
i crescha narradira  
e l'aura vegn anc pira.

I naiv' e naiva scrottas,  
ils uffants quels tiran bottas,  
ils corvs quels cratschlan sin la saiv  
ed ussa datti blera naiv.

# Tge fa l'aura damaun?

Oz es ti la meteorologa u il meteorolog!  
Observe l'aura. Hai blers nivels? Savuri  
da naiv? Splendura il sulegl u vegni  
a plover? Fai damaun la medem'aura?  
Penda tia previsiun, vul dir tes sulegl,

tes nivel da plievgia, tes artg son  
Martin u tes nivel da naiv vi da  
la fanestra e guarda damaun, sche  
ti has gè raschun cun tia previsiun!





# Sulegl

Ti dovras:

- 2 gronds plats da chartun
- colur da gouache melna
- in perforader

- bast oransch e mellen
- fil
- ina forsch






- 1 Prenda dus plats da chartun e colurescha las varts davos mellen. Cuntinuescha pir cura che la color è sitga.
- 2 Tegna ensemen ils dus plats, uschia sco sin il maletg survart. Fora rusnas en l'ur dals plats. Guarda che las distanzas sajan adina tuttina grondas.

- 3 Taglia giu tocs da bast da circa 30 cm.
- 4 Fauda permez ils tocs da bast e va cun il bast dubel tras las rusnas. Uschia datti in'anza. Enfila l'otra vart dal bast tras quella e tira fin ch'i tegna. Tras ina da las rusnas pos ti trair in fil per pender si il sulegl.


1




2



3



4





# Nivel da plievgia

2

Ti dovras:


- in gross palpieri blau en il format A3
- ina folia transparenta, per exempel dad ina mappa transparenta
- fil
- in rispli
- ina forsch
- colla





- 1 Prenda il palpieri blau e fauda el ina giada, uschia che ti survegnis in A4. Dissegna lura in grond nivel che emplenescha tut la pagina. Dissegna il nivel uschia che la part sura è là, nua ch'è la fauda.
- 2 Taglia or il nivel. Taglia or in pèr strivlas da la folia transparenta.
- 3 Colla las strivlas transparentas sin la part interna dal nivel. Colla lura ensemen las duas mesadads dal nivel, per che las strivlas tegnian bain.
- 4 Penda si il nivel da plievchia vi d'in fil.

1



2



3



4





# Artg son Martin

3

Ti dovras:

- 2 gross palpiris alvs en il format A4
- palpiris da crep en las colurs da l'artg
- fil
- in rispli
- ina forsch
- colla





- 1 Prenda in dals dus fegls e dissegna in grond nivel che emplenescha tut la pagina.
- 2 Taglia ora quest nivel. Prenda el sco schablona per il segund nivel. Quel duai esser precis tuttina. Taglia giu strivlas da 50 cm da mintga colur dal palpiri da crep.
- 3 Colla las strivlas sin in dals nivels e tatga lura ensemen ils dus nivels. Sche ti vuls, pos ti anc dissegnar ina fatscha rienta al nivel.
- 4 Penda si l'artg son Martin vi d'in fil.

1



2



3



4





# Nivel da naiv

4

Ti dovras:

- in gross palpiri alv en il format A4
- vatta

- fil alv
- ina forsch
- ina guglia



- 1 Prenda il feagl e disegna in grond nivel che emplenescha tut la pagina.
- 2 Taglia or il nivel.

- 3 Prenda in toc fil e la gugia. Fora cun la gugia tras pliras cullas da vatta e reparta ellas sin il fil. Guarda ch'i dettia distanzas regularas. Fa in nuf en il fil. Repeta quests pass in pèr giadas. Fora ils fils cun scrottas da naiv tras l'ur sut dal nivel e fa nufs per ch'i tegnia.
- 4 Penda si il nivel da naiv vi d'in fil.

1



2



3



4

